

point garde à tout cela, si on ne m'en eut aduert; si bien qu'il me vint vne pensée si ie ne deuenois point fourd, mais ie m'apperceue bien que mon cœur me parloit si fort que ie n'escoutois point les creatures. *Magnus Dominus & magnitudinis eius non est finis.* O que Dieu est grand, & qu'il est bon; si les Sauuages pouuoient tirer ces pensées & ces sentimens d'un autre endroit que du Liure viuant, qui est Iesus-Christ, ie douterois s'ils difent vray, mais ils n'ont ny liure imprimé ny escrit à la main, & quand ils en auroient, ils n'y cognoissent rien, ils n'ont commercé avec aucun homme de la terre qui leur puissent donner ces pensées, c'est ce qui me fait dire que cette diuine source de lumiere & d'amour verse par soy mesme, ou par le ministere des bons Anges, ces sainctes [99] pensées, & ses doux sentimens dans des cœurs iadis remplis de barbarie, & maintenant possédez de Dieu.

Pour la Communion, comme on commença de l'instruire sur ce mystere vrayment adorable, il s'écria tout remply d'étonnement, ô Sauuages, ferez vous tousiours des chiens; n'aurez-vous iamais d'autre nourriture que celles des chiens: Et comme on luy recommandoit de ne point declarer cette doctrine à ses compatriotes, qui n'ont pas encor la Foy: Non, non, fit-il, ne craignez point, ie scay bien qu'ils ne font pas tous capables de ce que vous m'enseignes: C'est pourquoy ie ne leur dy rien que ce qu'il faut dire à des fols pour les guerir de leur maladie: Cette responce non attenduë nous fit rire, car il la donnoit avec assez de grace & de candeur. Comme il voulut s'approcher de cette table, Monsieur Gand le Parrain le conduisant, Dieu luy donna vn grand sentiment